

Fundacion Un Oportunidad Mas ta desea di sirbi mas cu bo cooperacion

ORANJESTAD - Fundacion Un Oportunidad Mas, tambe conoci manera F.U.N.O.M., ta un fundacion di boluntario cu ta existi di aña 2009, cu e meta di ofrece un contribucion y alivio real na nos comunidad, door di duna ayudo na esunnan cu e malesa di adiccion. Loke cu ta hopi particular di F.U.N.O.M. ta cu el a ser funda pa personanan cu nan mes a ser rehabilita aki na Aruba mes y cu actualmente tin entre 8 te cu casi 20 aña "limpi y sober." Nan ta completamente reintegrando den e sistema laboral y tur dia ta aportando na nos pais Aruba.

BOLUNTARIONAN

Banda di e personanan aki a uni nan mes un cantidad di hende cu nunca tabata tin e malesa di adiccion nan mes, pero cu si a ripara cu mester actua y mester yuda den nos comunidad, pasobra e situacion ta grave y e ta urgente. E problematica di adiccion ta uno cu ta toca cada un di nos den e comunidad aki di un forma directo of indirecto y F.U.N.O.M. ta enfatisa su esfuersonan mas tanto ariba loke cu ta trata esunnan cu e problema di adiccion cu ta ambulante; esta, esunnan cu no tin luga fiho pa biba of un manera sigur, fuera di peliger pa haya na mes.

STRAATHOEKWERKERS

Un ehempel di un di e tareanan cu F.U.N.O.M. a bin ta haci den e ultimo añanan ta cu'n cantidad di su miembronan ta fungi manera "straathoekwerkers." Esaki ta e persona cu ta acerca y gana e confianza di e persona den adiccion, combersa cun'e te ora cu e por mustre cu tin un otro perspectiva na su situacion pa asina dun'e un empuhe pa e ricibi ayudo. Di e momento eynan, F.U.N.O.M. ta traha cerca cu otro instancianan den nos comunidad cu ta yuda pa e persona den adiccion bay afo pa bay rehabilita.

MAS COS TIN CU WORDO HACI

Maske cu F.U.N.O.M. tin algun aña activo caba y cu hopi bon resultado, toch e miembronan ta desea di haci mas, ya cu por a nota cu tin personanan den adic-



Esaki ta un di e manera cu bo por yuda contribui na Fundacion FUNOM. En bes di 5 florin bay pa "crack", duna 5 florin pa lanta bek.

cion cu no tin nan documentonan na ordo of cu no ta bini na remarca pa bay den exterior pa rehabilita, cual ta haci e situacion sumamente dificil, te casi imposibel pa nan ricibi yudansa aki na Aruba mes, si en caso nan ta desea di rehabilita di manera boluntario.

CAS DI PREPARACION

Pa e motibo aki, Fundacion Un Oportunidad Mas (F.U.N.O.M.) ta duna bo danki di antemano pa bo cooperacion pa haci posibel cu den poco tempo por existi un espacio caminda cu e personanan cu e malesa di adiccion por yega na ayudo y na guia durante nan preparacion pa bay rehabilita den un ambiente humano

y sin discriminacion di rasa, religion, nacionalidad, sexo of preferencia. E cas di preparacion pa rehabilitacion aki ta e prome paso den ful e proceso di rehabilitacion.

CONTRIBUCION

Bo por haci bo contribucion na CMB Acct #600 331 002 of durante e siman di collect, cual ta 24 SEPTEMBER pa 1 OKTOBER venidero, deposita maske cu ta 5 florin cerca un di nos miembronan y colaboradonan cu lo ta para na diferente localidad na Aruba e siman ey pa reuni e fondonan necesario pa F.U.N.O.M. por sirbi mas. Corda: "en bes di 5 florin bay pa 'crack,' duna 5 florin pa lanta bek." Danki pa yuda nos sirbi mas! □